

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

20 Avril 2018
(03 Shabaan 1439 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor: « Remerciements à Allah & Bane Conseils (Partie 2) ».

Alhamdulillah Summa Alhamdulillah, Allah (swt) fine donne moi le Tawfiq pour continuer 2^{ème} partie de mo Khutba Jummah ki mo ti commencer vendredi dernier lors mo bane conseils à bane madames et bane missiés de la Manifestation Divine.

Pou mette kikaine lors le droit chemin li franchement zamais ene travail facile. Mais sa vraiment ene acte de la plus haute vertu. Li donc obligatoire pour tous bane membres de nous Jamaat dans le monde entier pou non seulement associer nous bane membres à tous bane types d'activités pour zot propres bien-être et celui de nous Jamaat, mais aussi pou permette zot pou assume bane charges sociales ki pou fer zot vine bane citoyens responsables. Sa c'est parski la prise de responsabilité pou sans aucaine doute change la perception d'ene dimoune. Sa pou fer bane dimounes approfondi zot bane connaissances et zot expertise et zot pouvoir de réflexion (zot capacité pou réfléchi). Sa pou permette zot pou vine bane individus indépendants ki pou capave apporte bane l'idées pour le bon entretien et la réforme de nous Jamaat dans bane l'années à venir. Sa pou aide zot pou développe zot personnalité et pou maintenir ene relation étroit avec zot Deen (religion - c'est-à-dire, l'Islam).

Bane office-bearers de nous bane différents l'organisations (*Jamaat*), quel que soit bane noms ou fonctions ki nous donne zot, bizin gagne ene bon l'entraînement le plus tôt possible pour permette zot pou assume zot bane responsabilités plus tard. Le Jamaat bizin ena bane membres dignes de confiance et pieux à la tête, bane dimounes ki pou capave maintenir l'équilibre de tout le système islamique avec l'aide d'Allah, et pour sa, *Taqwa* li absolument important. Sans *Taqwa*, l'homme li couma ene plante sans la vie. Li pou alle à la dérive sans la piété, la droiture, et la crainte absolue et le respect pour Allah, ki trouve tout, et ki entende tout (*Sami'ul Baseer*).

Ainsi, en donnant à nous bane jeunes bane responsabilités plus tôt dans la vie, sa pou aide zot pou perfectionne zot niveau d'appartenance à la cause d'Allah; zot pou comprend mieux nous cause et pou faire zeffore pou plaire à Allah dans tout saki zot faire. Rappel-zot, Satan li l'ennemi le plus acharné de l'homme. Li et so l'armée pou essaye dévier zot dans différents moments de la vie, mais zot bizin pas prend so bane paroles et so bane invitations compte, et zot bizin concentrer zot l'attention et zot l'amour lors Allah et So vérité. Suive toujours le bon chemin, même si c'est ene million de fois difficile, mais mo assure zot ki à la fin de sa chemin zépine là zot pou gagne ene récompense extra délicieux. Rappel-zot ki zot bane sacrifices bien temporaires alors ki bane récompenses promis par Allah zot éternel. Maintenant, c'est à zot pou choisir laquelle chemin zot pou prend: le chemin de la ruine ou le chemin du salut.

Rappel-zot ki la formation de zot bane zenfants - bane futurs éléments illuminé de nous Jamaat bizin commence bonnaire, dès zot naissance ziska la mort. Mais en aucaine cas bane parents faudé pas formule bane promesses officiellement - au niveau de la Jamaat - pou dédier zot nouveau-nés dans le chemin d'Allah, dans la cause du Jamaat Ul Sahih Al Islam. Si zot ena sa l'intention là dans zot, alors élever zot bane zenfants d'après bane normes islamiques, enseigne-zot l'amour pour Allah et So bane prophètes et pour le Quran et l'Islam et la cause de nous Jamaat. Vine ene ti Ibrahim (as) et laisse zot bane zenfants vine pareil couma ene ti Ismael (as) kot c'est kan li ti arrive à ene l'âge adolescent kot c'est à sa moment là ki Hazrat Ibrahim (as) ti raconte li so vision ki li ti fer kan li ti bébé, et fine demande li so décision lor sa vision ki Allah (swt) ti montrer li là. Lerlà Hazrat Ismael (as) fine dire so papa, fer saki Allah fine dire toi fer. Bé dans sa cas pou dédier bane zenfants dans le chemin d'Allah, faudé fer couma Hazrat Ibrahim et Ismael (as) ti fer et faudé pas li vine ene catastrophe pareil couma Jamaat Ahmadiyya concernant *Waqfé Naw*. Zenfant pas encore né, ou sois fini né, et fine dédier zot seulement pour faire plaisir Khalifa.

Azordi nous fine gagne résultat commié vraiment parmi bane dédiés fine reste *Waqfé Naw*. Ene bien faible pourcentage en tous les cas, surtout à Maurice!

Alors pas force zot kan zot atteindre l'âge de la compréhension. Au lieu de sa, bizin cause avec li (ki li ene garçon ou ene tiffille) et laisse ou zenfant décider si pas li pou travaille pour la cause d'Allah ou non. Rappel-zot bane erreurs ki fine commette dans le passé, et pas répète sa bane erreurs là. Quran même dire, pas force personne dans la religion. Pas promette pou dédier zot bane nouveau-nés parski zot pas ena le pouvoir pou exprime zot. Si pareil couma la maman de Hazrat Mariam (ra), zot ena ene désir pou dédier zot zenfant pour la cause d'Allah, alors c'est entre zot et Allah, et c'est Allah ki pou choisir pou accepter ou demande/ *duah* ou non (parski pareil couma pou Hazrat Mariam et so maman, zot ti ena bane conditions pou rempli ki ti attacher avec sa l'acceptation de *duah* là, telle couma li bizin reste en séclusion dans bane places sacrés).

Mais mo conseille zot, zamais pas prend la décision pour zot bane zenfants en ce qui concerne le dévouement à vie à la cause d'Allah. Laisse sa vine naturellement avec l'aide d'Allah et ene bon l'éducation ki zot pou donne à zot bane garçons et tiffilles dans le chemin d'Allah. Kan zot pou ena ene bon l'éducation et pou ena ene relation solide avec Allah, alors zot bane décisions pou influencer par la volonté d'Allah envers saki meilleur pour zot.

Mo conseille donc à tous bane Siraj Makin pou commence ene bon l'entraînement spirituel de zot bane zenfants bien bonnaire, et ainsi ki tous bane zenfants et jeunes - bane jeunes filles - dans nous Jamaat. Pas ena aucaine doute ki bane formateurs et bane stagiaires appartenir à deux départements distinctif. Quand ene Siraj Makin donne ene l'entraînement normal directement à quelqu'un, li récompensé par la bénédiction divine. Et même kan Siraj Makin là faire avance bane choses par d'autres moyens et personnes, là aussi alors li recevoir l'approbation Divine. Et ene fois ki ou commence faire avance bane kitchoses par bane les autres et dans sa processus là, ou sacrifier aussi ou létemps et ou bane ressources, alors pas ena nannié ki pou capave empêche ou développement spirituel rapide. Li appartenir maintenant à la direction de bane Siraj Makin pou donne à zot bane pli jeunes membres bane fonctions ki ena bane liens étroit et distinctif avec la religion (l'Islam). Zot bizin instruire bane jeunes pou tire meilleur parti de zot bane talents et pou familiarize zot avec la joie ki présent kan ou travaille sans relâche pour la foi. Pour commencer, bane jeunes filles bizin gagne bane charges de travail mineures afin ki la distinction entre le formateur et so stagiaire li réduite au niveau minimal. En fait, le programme

de travail bizin être conçu de manière à associer nous bane pli jeunes éléments de la communauté à ene cycle de travail constant.

Pour ki zot vine pli efficace, bane Siraj Makin bizin encore bane madames et filles pou travaille pour la cause d'Allah. Pour ajoute plisse poids et prestige à l'organisation, Siraj Makin (en tant ki ene organisation) bizin élargir so champ d'activités particulier et distribuer so bane responsabilités entre bane jeunes générations. Sa pou aide pou supprime bane barrières ki sépare bane groupes de différents statuts et classements. Zot pou trouver couma Allah pou commence béni tous zot bane fonctions et avec ki rapidité bane jeune générations pou commence reflecter dans zot vrai l'esprit de bane l'enseignements islamiques.

Bane tiffilles du Jamaat Ul Sahih Al Islam bizin immédiatement vine active au sein de nous bane organisations religieuses et gagne ainsi la possibilité pou rendre service à la communauté, ki li individuellement et collectivement aussi. Li bizin clair pour nous bane zenfants ki l'héritage le plus précieux de l'humanité c'est le service à bane les autres (à l'humanité) et surtout servir l'Islam, nous la foi. Mo confiant ki si sa plan là fonctionne bien, alors sa pou ene ti avant-propos pour nous l'avenir brillant et béni.

Maintenant quelques conseils pour nous bane z'hommes. Comme ene précision de mo explication lors le *Pardah* dans mo Khutba Jummah de la semaine dernière, zot bizin mette sa bien dans zot l'esprit ki l'Islam pas enjoigne le *Pardah* à bane madames afin pou faire zot vine bane esclaves pou ki bane missiés exploite zot. Et sa commandement d'Allah pour bane madames ki dire zot garde zot chasteté, c'est pas dans l'intention pou transforme zot en bane servantes pour bane missiés. Fer attention! La vérité c'est ki tous bane missiés et tous bane madames zot égales dans lizié d'Allah. Mais selman, ena bane différences physiques entre bane sexes ki divise pou sakaine d'entre sa deux parties là zot domaines d'activités dans différents branches. C'est pour sa raison là tousel ki ena bane différences fondamentales entre bane devoirs et bane fonctions de bane missiés et de bane madames. De même, ena certains applications distinctives ki exister dans le code de la loi islamique, kot bane z'hommes et bane madames zot être traité différamment d'après zot sexe.

Néanmoins, sa l'approche séparé là li pas motivé par bane principes systématiques; et beaucoup moins par le culte de la supériorité de bane z'hommes (c'est pas à cause bane missiés pli supérieur) . Mais en ce qui concerne bane droits de l'homme, na pas ena divergences entre sa deux parties là, hommes et femmes. Sa blesse moi beaucoup pou mentionner ki à cause bane mauvais l'influences ki régner dans nous

société, ena pas mal de tyrans parmi bane missiés de nous propre la société moderne qui montrer bien tigitte respect pour bane droits de bane madames. D'après zot, bane madames zot nek bane machines ki produire bane zenfants et de ce fait, zot bizin subir toutes sortes de difficultés pour faire plaisir zot bane missiés. Sa bane missiés là expecte ki sa bane madames là agir couma bane zanimo muet et ki zot pas plaindre de traitement brutal ki zot recevoir par bane missiés là. Sa bane kalité z'hommes là croire aussi ki zot ena le droit pou batte zot bane madames sous bane fausses prétextes. Ena beaucoup l'exemples de sa types là dans l'Islam aussi et mo lé cœur souffert amèremment de bane telles situations pareil ki li dans nous société moderne et dans l'Islam dans so l'ensemble.

C'est sa bane là même bane misérables dans sa lé monde ki, au lieu ki zot pou rentre dans paradis, zot pou gagne l'enfer ki enba lipié zot mama; parski zot ena ene mépri pour bane droits de bane madames et alors Allah pou enferme zot dans So mécontentement. Zot pas seulement bane tyrans, mais kan zot fer sa, par zot bane mauvais actions, zot pé bafoué le joli nom et l'image de l'Islam. Sa bane dimounes là, ki vraiment bane représentations du mal, zot fine tellement ignore nous système social efficacement dans le monde extérieur ki l'Islam li maintenant considéré presque couma ene symbole kot zis missié ki ena supériorité et l'autorité. Dans zot lizié, la civilisation et la culture musulmane pé dévalorize bane madames au plus bas niveau de l'humiliation. Zot penser ki ene madame musulmane li attacher à bane rouages de la tyrannie et de l'oppression et ki la chaîne de bane coutumes et usages maintenir li perpétuellement sous bane talons d'ene missié musulman.

Insha-Allah, mo pou contigner lor le même sujet vendredi prochain. Entre-temps, ki sak membre du Jamaat Ul Sahih Al Islam réfléchi lors so bane actions et so comportement, envers so propre conjoints ou conjointes et envers la société. Rappel-zot, Jamaat Ul Sahih Al Islam et la Manifestation Divine ki forme parti intégrante de li zamais pou vine zot PASSEPORT POUR LE PARADIS, ziska ki zot réforme zot bane actions et zot comportement et ki zot fassone zot dans bane l'états pli purs, pour Allah. Reconnaîte et accepter l'avènement de sa humble serviteur là comme le Khalifatullah (atba) et intégrer Jamaat Ul Sahih Al Islam pas pou servi à nannié à moins ki ou réforme ou conduite et fassonne ou la vie d'après bane préceptes de l'Islam, et ki zot traite avec bonté zot bane parents, conjoints/ conjointes, zot bane zenfants, parents, voisins, frères/ sœurs dans la foi et le reste de l'humanité. Ki Allah permette à chacun d'entre zot pou débarrasse zot de tous bane l'influences sataniques et vine ene modèle de l'Islam lors la terre. *Ameen*.